



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 3

Pak. nung FIH Olympic qualifiers ayongzüka asayatsü

Congress tir Kharge-i opposition senden atema lenirtem jaok



VOL. XX NO. 269 (ADOK 269)

DIMAPUR RASEMNÜ (WEDNESDAY)

CHITENI (JULY) 12, 2023

₹ 5.00

SC-i Centre aser state sorkar dang tuyur

New Delhi, July 11, 2023 (Agencies): Supreme Court-i Centre aser Manipur sorkar dang sensotem kümzüka ayutsü atema mapa inyaksü tetuyuba agütsüogo.

SC-isa sorkartem dang yimsüngtem aser tekülem kitem yanglushitsü atema senotsü agütsü tetuyuba agütsü.

Telok aser kija kari yimjak nung tashishitsü aketba olen jembir anungji o kanga kümdanga jembitsü aser tesempatep adoktsüba o mejembitsü mepishir, ta SC-isa metetdaksü.

"Linük nung law & order maparen ya sorkar ket nung lir anungji Supreme Court-i Army aser tanga central armed police forces mapa lezmüksütsü atema tetuyuba kecha magütsütetsü" ta Chief Justice D Y Chandrachud-i aniba bench-i ashi.

Iba bench nung justice P S Narasimha aser justice Manoj Misra na dena lir aser parnoki

sensotem den nija aser sokar rongsen kümzüka ayutsü atema sepai peria mapa lezmüksütsü atema tetuyubabo agütsüogo.

"SC-i tesem kar nung Army aser paramilitary forces mapa lezmüksütsü atema tetuyuba agütsütsüba tim masü. Ajisüaka onoki Centre aser state sorkar dang Manipur nung nisung taküm kümzüka ayutsü metetdaksür" ta SC bench-i ashi.

SC bench-isa Centre aser Manipur sorkar atema noktaker Solicitor General Tushar Mehta dang hopta ka tsüngda action taken report (ATR) ka agütsütsü metetdaksü. Lawyer kari Manipur nung alirtemi khuret balala ajuruba indang SC dang ashiba atema ATR meshir.

SC-isa Manipur sorkar dang tasür kinungertem escort/protection kübok mortuary balala semdangtsü aser kinunger ket nung tasü mang agütsütsü atema mapa inyaksü tetuyuba agütsü.

Northeast nung tzunglu kanga arutsü: IMD

Guwahati, July 11, 2023 (Agencies): Indian Meteorological Department (IMD)-i taruba anogo ishika Northeast nung tzunglu kanga arutsü osang metetdaksüogo.

Taruba anogo 3-4 tsüngda Sikkim, Assam, Meghalaya, Arunachal Pradesh, Nagaland aser Manipur kübok tesem kar nung tzunglu kanga arutsü ta IMD-i ashi.

July 11 aser July 12 anogotem Arunachal Pradesh, Meghalaya aser Sikkim nunga tzunglu kanga arutsü ta parnoki ashi.

IMD-isa Bodbar tashi Assam, Meghalaya, Arunachal Pradesh aser Sikkim atema "orange alert" metetdaksüogo.

Nagaland, Manipur, Mizoram aser Tripura nunga maneni "yellow watch" alitsü ta IMD-isa ashi.

Assam police 24 mapa nungi anentsüogo

Guwahati, July 11, 2023 (Agencies): February 1, 2023 nungi tanü tashi nung Assam Police nungi nisung tamajung 24 tashi mapa nungi anentsüogo.

"Chief Minister-i tetuyuba agütsüba ama February 1, 2023 nungi tanü tashi nung Assam police 24 tashi mapa nungi anentsüogo" ta DGP Assam, GP Singh-i metetdaksü.

Taoba mapang Assam chief minister Himanta Biswa Sarma-i Assam Police nung 'black sheep' anema mapa maneni inyakdar ta shia liasü.

Assam police nung nübo 70,000 shi lir aser iba nungi nisung tamajung 2% mesüra 3% shi alitsü akok, ta CM Sarma-i ashi.

"Ochimashi inyakba police anema onoki mapa inyakdar aser parnok mapa nungi anentsü. 2026 tashi nung Assam police ya linük nung nübor den tesentaktep tajung aliba police force tajungtiba kümdaksütsü alizüng lir" ta pai ashi.

"Testüiba küm aika state police force-i telungpurtem den rarayonga aru aser parnok tangatetba iba amaji anitet. Assam

nung telungpur khuret 90% agienogo aser state police-i civil society yaritsü tangatetba aruogo. Maneni police-i tanü putu nung adokba cybercrimes, digital crimes, pornography aser cheating cases anema raratsüla. Iba jagi sorkari parnok nem nüngdakba osettsüset aser infrastructure agütsür" ta CM Sarma-i metetdaksü.

July 11, 2023 nü Assam police constable ka mapa nungi anentsüogo. Iba nisung ya Nripendra Kumar ta jangiaogo aser pa ya Hombar aonung Fatasil police station, Guwahati nung yi agi meseper mejanga orr lia apu. Iba mapang pa ya police station nung sentry duty liasü.

Nripendra Kumar dangi phone aiben süka magizük. Tongti ketdangsürtemi special night round ama police station semdang aser idangji pa mejanga orr liasü ta Assam police-i metetdaksü.

Ketdangsürtemi breath analyzer amshia Blood Alcohol Concentration (BAC) tendanga repringba positive adok. Iba agi pa mapa nungi anentsüogo ta Assam police-isa ashi.

T.R. Zeliang-i gari lenmang yanglurtem den senden amen NH nung company mesüra contractor indang signboard ayutsü



Mongulbarnü Deputy Chief Minister aser National Highway Minister in-charge T.R. Zeliang-i ketdangsürtem den külemi July 4 nü lendong atalokba tesem semdangba angur.

Dimapur, July 11, 2023 (TYO): Mongulbarnü Deputy Chief Minister aser National Highway Minister in-charge T.R. Zeliang-i gari lenmang yanglurtem den senden ka menogo.

Rhododendron Hall, Chumoukedima police complex nung TR Zeliang-i National Highways-Public Works Department (NH), National Highway and Infrastructure Development Corporation Limited (NHIDCL) aser Border Roads Organisation (BRO) ketdangsürtem den senden amen.

"Gari lenmang yangluba agency ajak dang July 21 matongdang tzungluruwa atema maparen renemba mesüra public safety atema inyakba osang agütsütsü tetuyuba agütsüogo" ta TR Zeliang-i senden amenba sülen osangbener den jembidang ashi.

"Tarutsü nung nübortem lendong tulu nungi kümzüka ayutsü atema safety measures inyaksüla. Maparen tashishitsü melii inyakba sayutsü aser tebilemtsü abentsü atema Nagaland nung aliba national highway indang package shia

nung company mesüra contractor tenüng züluba signboard ayutsü" ta pai ashi.

"NHIDCL-i state sorkar dak tai tongloktsüba anentsüla aser pei lezmüka aliba mapa shitak inyaksüla. Asenok kati ka akhümsübutepa inyaka aotsü süra state sorkar dak tai metongloktsütsüla" ta TR Zeliang-i metetdaksü.

Nagaland Pollution Control Board-i September 25, 2020 aser February 4, 2021 anogotem iba tesem nung dynamites mamshitsü atema shiditem züluba atema pai NHIDCL den ashishitep.

Patkai Bridge nungi iba tesem tashi gari lenmang ya DPR nung lateta aliba ama inyak asü aser lung anenzüka aludang lenmang nung indangindanga metsüksü atema tawa (space) peria yutsü asü meyutsü ta TR Zeliang-isa NHIDCL dang asüngdanga liasü.

"NHIDCL-i safety measures atema state sorkar dak tai metongloktsütsüla. Tapayutsü takütem samaba ken o atema iba amai meinyaksüla" ta paisa NHIDCL dang ashi.

Gari lenmang ya Nagaland state nung aliba nübortem

meiyong lir aser asenoki parnok tsüngdang telangzüba agütsütsüla ta paisa nenshia ashi.

"State sorkari Niuland ajanga Dimapur nungi Kohima tashi tanga lenmang ka yangludat. Iba lenmang shilem ka ali kibur ken o ajanga metembangtet lir saka iba ya yangluzükba sülen Kohima den tajunga sendakteptsü. Iba lenmang yagi Niuland nungi kilometer 37 dang pilar Zadima den sendakteper" ta TR Zeliang-i ashi.

Iba sülen Deputy Chief Minister TR Zeliang den ketdangsürtemi July 4 nü Chümuokedima police check gate tejenba anasa lendong atalokba tesem semdanga liasü.

Osangbenertemi TR Zeliang dang July 4 atema tebilemtsü khuret shibai abentsü ta asüngdangdang "iba ya alima lendong ka liasü" ta pai langzü.

"NHIDCL ya technically expert organization ka masü saka implementing agency ka dang lir" ta pai shisem.

July 4 lendong ya mezüng masü saka iba ya matalokdang kasa tesem nung lung anenzüka aludang gari pezü tashi raksaa liasü, ta TR Zeliang-i metetdaksü.

Nagaland-i Fisheries Summer meet-2023 nung aden

Dimapur, July 11, 2023 (TYO): Fisheries & Aquatic Resources Advisor A. Pangjung Jamir-i anir ketdangsürtemi Fisheries Summer meet-2023 nung denogo.

Advisor Pangjung den Fisheries & Aquatic Resources Department nung Joint Director Neithi O- Kuotso aser Deputy Director Dr. Rongsen Kumzuk nati "National Fish Farmers Day" nung aden.

Iba sentong ya July 10 aser

11 anogotem Mahabalipuram, Tamil Nadu nung ayongzüka among aser State o Union Territory balala nungi minister tem den ketdangsürtem aden.

Iba sentong nung Minister of Fisheries, Animal Husbandry & Dairying, GoI, Parshottam Rupala-i okila jemi aser Union Minister of State, Fisheries, Animal Husbandry & Dairying, Dr. L. Murugan aser Dr. Sanjeev Balyan nati o jemi.

Union Minister Dr. L.

Murugan-i video conference ajanga Pradhan Mantri Matsya Sampada Yojana (PMMSY) kübok fisheries projects 176 sayatsüogo.

Iba nung Nagaland nunga mapatong 4 densema lir. Brood Bank, Nathanglu, Mokochung District; Live Fish Vending Centre, Kohima District aser Tenyiphe, Chumukedima District o Nihoto, Niuland District nung bio-floc units ana lir.

NHSRC aser RRC-NE nungi teshimtet telok kati Nagaland semdang



National Health System & Resource Center, New Delhi & Regional Resource Center - NE nungi teshimtet nisung telok kati Nagaland semdangba mapang DoHFW ketdangsür aser Commissioner Secretary, H&FW, Nagaland Y.Kikheto Sema, IAS nungertem pa indang office chamber nung tangokba noksa ka yangi angur.

Dimapur, Chiteni/July 11 (TYO): National Health System & Resource Center (NHSRC), New Delhi aser Regional Resource Center - NE (RRC-NE) nungi züngsem pezü agi akumba telok kati July 10 nungi 12, 2023 tashi Nagaland semdangba mapang lir.

Iba telok nungya Dr. Poonam, Consultant, NHSR, New Delhi; Dr. Priyanka, Consultant, NHSRC, New Delhi; Munitatat, Consultant NHSR, New Delhi aser Sagarika Klita, RRC-NE, Guwahati nungertem lir aser parnok Commissioner & Secretary, DoHFW, Nagaland, Y.Kikheto Sema, IAS aser Principal Director Dr.Vibeitunuo M. Sachu aser Department ketdangsürtem den ajurutepa liasü.

Department ketdangsürtem den sensaksemba mapang, Public Health Cadre angatetdakja state yaritsü asoshi

parnok aru, ta Dr. Poonam-ashi.

Laisa tang Department indang Service Rule pela agizük, kong state ya category balala nung lemsar temaba jenjangi majungketdang category ajunga nung nübu lemsar.

Laisa Commissioner & Secretary, DoHFW mendenpuba sür state nung Public Health Cadre indang State Task Force tentettsü ajungshia liasü.

State indang litsü-lika aser 'topographical uniqueness' mechi health tsütsü tayongzükba tulu lir, ta Y.Kikheto Sema, IAS ajanga ashi.

Abensa zünger aliba nübu agi anünga aser state nung post talila meyanglutetba mechi Nagaland ama state nung Indian Public Health Standard (IPHS) nung anidaksü kanga tasak lir, ta pai ashi.

Pai Government of India

dang policy balala yangludang region nung tetsükdaksü balala asadangsü mepishi, kechiaser mainland nung ama tenem aliba tesemtem nung meinyaktettsü, ta ashi.

Chief Minister's Health Insurance Scheme (CMHIS) aser Pradhan Mantri Jan Arogya Yojana (PMJAY) ajanga cashless health care agütsütsü atema inyakteper, ta pai ashi.

State nung healthcare tajungtiba nung agütsütettsü mechi nüburtem aser NGO densema communitisation kumdaksütsü inyaker, aser iba atema Government of India teyari nungdaker, ta Kikheto-i ashi.

NHSRC & RRC-NE nungi züngsem temi Dimapur nung aliba Health Units tem semdanga liasü aser ano Naga Hospital densema Kohima district nunga Health Unit tem semdangsü.

Indigo Airlines nung Cabin Crew (tetsür) shimtsü

Dimapur, Chiteni/July 11 (TYO): Deputy Commissioner, Kohima ajanga sangdong ka nung ashiba agi, Indigo Airlines ajanga Indigo Airlines Cabin Crew (tetsür)

shimba sentong ka August 3, 2023 nü Emporium Skills Training Institute, Dimapur nung agütsü.

Iba dak sendakba nung stakeholders, kaketshir lokti

tentet, kin balala lokti tentet, college aser lanur lokti tentet ajunga dang iba osang prokshia iba maongka nübu timbai agidaktsütsü ayongzüka liasü.

Vuto Hyundai Kohima nung SUV Hyundai Exter sayaogo



Kohima, Chiteni/July 11 (TYO): Vuto Hyundai Kohima nung Mongulbarnü SUV Hyundai Exter tasen sayaogo.

Iba gari ya Branch Manager Kohima Personal Banking Branch, Jesse Pienyü aser SBI Secretariat Branch Manager Adahrii Mao nati semzüksü, kong Vuto Hyundai MD Metuo Liezietsu dena liasü.

Vuto Hyundai general manager Mhaphruovizo

Liezietsu-i sentong nung pela agizükba o jembia liasü aser Sales Consultant Imlisunep-i gari tasenba indang rateta ashidang Hyundai Exter ajanga customer tajangshiba balaka alitsü aser 'urban & outdoor lifestyle' agütsütsü aser sadoksayim balaka alitsü, ta

ashi.

Iba gari nungya powertrain options asem - 1.2 l Kappa Petrol engine (E20 Fuel Ready) available with 5-speed manual transmission (5MT) aser Smart Auto AMT (Automated Manual Transmission) aser 1.2 l Bi-fuel Kappa petrol den CNG engine angütsü, kong 5-speed Manual transmission lir, ta pai ashi.

Class-VI JNV selection test atema online registration agütsü

Dimapur, Chiteni/July 11 (TYO): Jawahar Navodaya Vidyalaya (JNV) nung Class VI nung admission agütsü asoshi JNV selection test agütsü atema online ajanga registration agütsü, ta sangdong ka ajanga ashi.

Iba atema link ya JNV indang website www.navodaya.gov.in nung angütsü.

Application agütsütsü asoshi tatem anogo ya August 10, 2023 alitsü. District balala nung aliba meta tezülen nungi temsüa aliba

kaketshir nem maongka agütsütsü mechi registration ya online nung agir, ta sangdong ajanga ashi.

2024-2025 session atema Jawahar Navodaya Vidyalaya indang selection test nung India tesem balala nungi kaketshir lakh 30 shi tenüng agütsütsü imlar, koba 'winter-bound JNVs' atema

November 4, 2023 nü aser 'summer-bound JNVs' atema August 20, 2024 nung agütsü, ta sangdong ajangasa ashi.

Mkg. nung World Population day sentong aka



Mokokchung, Chiteni/July 11 (TYO): Mokokchung nung tanu alima ajunga den külemi World Population Day sentong Chief Medical Officer, office Conference Hall nung kanga dang takok nung kaogo.

Tanu iba sentong nung Deputy Commissioner mokokchung Tsüvisie Phoji NCS-i tayongzükba o jembia aser District Programme Officer

Dr.Takosünep-i, takum World Population Day 2023 omen "Unleashing the power of gender equality:Uplifting the voices of women and girls to unlock the world's infinite possibilities nung ajemdaker jembia liasü, iba sentong temer kelen Mokokchung DC-isa IEC gari flag off sütsü aser tanu IEC nung inyaker temi Changtongya block semdanga liasü.

Advisor T.N.Mannen-i Union Minister Arjun Ram Meghwal ajuru



Advisor, Law & Justice, T.N.Mannen aser Economic Advisory Council (EAC) to Prime Minister mendenpuba, Dr Bibek Debroy noksa nung angur.

Dimapur, Chiteni/July 11 (TYO): Advisor, Law & Justice, T.N.Mannen-i July 11, 2023 nü Union Minister, Law and Justice, Parliamentary

Advisor T.N.Mannen-i July 7, 2023 nü Dr Bibek Debroy, Chairman, Economic Advisory Council (EAC) to Prime Minister ajurua liasü.

Advisor-i Department nung Nagaland State High Court yangluba dak sendakba aser state atema danga ki o jen nungdakba indang lemsatepa liasü.

North Eastern Reorganisation Act kübok High Court amenoktsü asoshi Parliament nungi temelaba angütsü nungdakba indang lemsatepa liasü.

Meghwal-i item khuret angateta yaritsü ashi aser tekeratiba nung Nagaland semdangsü jangra aliba shia liasü.

Advisor T.N.Mannen-i July 7, 2023 nü Dr Bibek Debroy, Chairman, Economic Advisory Council (EAC) to Prime Minister ajurua liasü.

Pai iba mapang High Court ki o jen terenlok, Customary Court amenoktsü indang tebilemtsü lemsatep aser iba atema ato kilonser nungi teyari meshia liasü.

Dr Bibek Debroy-ia akok tashi yariteptsü langzüa liasü. Nagaland dak sendakba nung tongtipang ken o kar ato kilonser dangi aruba indanga pai lemsatepa liasü.

Union Minister Arjun Ram



Assembly Monsoon Session mapang Bihar Assembly nung Opposition lenir Vijay Kumar Sinha den party MLA temi Bihar Deputy CM Tejashwi Yadav mapa nungi agintsü khanga longkak aiba noksa nung angur.

Congress tir Kharge-i opposition senden atema lenirtem jaok

Nre Delhi, Chiteni/July 11 (Agencies): Congress tir aser Rajya Sabha nung Opposition lenir Mallikarjun Kharge-i, tongtibang opposition lenirtem dang July 17 aser 18 nü Bengaluru nung amentsü aliba taruba senden nung shilem agitsü jaokogo.

Congress lenir-i opposition party lenirtem dangi züluba shiti nung, Bihar Chief Minister Nitish kumar-i ayongzüka Patna nung June 23 nü opposition senden amenba mapang parnoki shilem agiba indang lephsia metetdaksü.

"Senden kanga takok ngua katetogo, kechiyong asenoki democratic polity amokmerenba ken o tongtibang aika sensaksemogo aser taruba general election nung longjemer tokteptsü atema ajaki mulunga

agizüka telemtetba agiogo," ta Kharge-i ashi.

Congress tir-isa, taoba senden nung July ita ajuruteptsü mulungteper senshiba indang lenirtem nem lephsia metetdaksü.

"Iba sensaksem ya maneni agitsü aser asenoki kechi tenteta ali iba ya tejakdangi bener aotsü kanga tongtibang ta bilemer. Linük nung tetsükdaksü balala ajangshia alibatem bentetsü atema lenmang bushitsü asoshi asenok longjemer inyaksü nüngdaker," ta shiti nungsa shia lir.

"Anungji ni nenok dang July 17 nü chiyongba sülen 6:00 ako nungi tenzüka Bengaluru nung amentsü aliba senden nung tamakok maludaksüü aru shilem agitsü mepeshir. Iba senden ya

maneni July 18 nüa 11:00 ako nungi tenzüka amentsü. Bengaluru nung nenok ajak ajurutsü yongya atar," ta Kharge-i shiti nung shia lir.

Mezüngbuba opposition party senden Patna nung amenba mapang party 15 dak temai shilem agia liasü, kong 2024 Lok Sabha election atema sensaksema liasü.

Lenirtem rongnung AICC tir Mallikarjun Kharge, Congress lenir tejen Rahul Gandhi, NCP tekolakba Sharad Pawar, West Bengal Chief Minister Mamata Banerjee aser Tamil Nadu CM M K Stalin nung densema liasü.

Iba senden ya 2024 general elections nung BJP tsükdaksütsü atema opposition party tem tasa asatsü atema ayongzüka mena liasü.

Foreign Secretary Kwatra aser Sri Lankan foreign minister na ajurutep

Colombo, Chiteni/July 11 (Agencies): India Foreign Secretary Vinay Kwatra aser Sri Lanka Foreign Minister Ali Sabry na Mongolbarnü ajurutepa

bilateral tesendaktep aser SL tir Ranil Wickremesinghe-i India semdangtsü aliba dak sendakba nung onük balala sensaksemogo.

Kwatra anogo ana atema Hombar aonung India tonga aru aser India nung project balala asadanga den Sri Lanka tir Wickremesinghe-i taruba hopta India semdangtsü aliba dak sendakba nung terenemshibatem asadanga liasü.

Sri Lanka foreign minister-i tweet ka ajanga, Ato Kilonser Narendra Modi-i tir Wickremesinghe India-i jaokba dak sendakba nung Indian foreign secretary den sensaksemogo, ta ashi.

"Onok linük anaparongla nung nüburttem ajanzükdaksütsü atema bilateral tesendaktep akangshitsüba dak rangloker sensaksema liasü," ta tweet nung shia lir.

Taoba mapang Kwatra-i Sri Lanka foreign secretary Aruni Wijewardena den ajurutepa sensaksemogo. Ketdangsürtemi ashiba agi, Kwatra-i sector balala nung India den inyaksü aliba

project tem indang asadangtsü aser tir Wickremesinghe-i India semdangtsü aliba atema renemtsü.

Wickremesinghe India-i anogo ana atema July 12 nü arutsü aser iba mapang Modi den ajuruteptsü imlar, ta ketdangsürtemi Deobarnü metetdakja liasü.

Parnoki ashiba agi, Wickremesinghe-i New Delhi mesemdang tsüngda par linük nung power & energy, aluyimba aser maritime dak sendakba nung India indang project tem benoktsü atema tembanga jembishinüobo.

Taoba küm tir mendeni atuba sülen Wickremesinghe-i tang mezüngbuba India semdangtsü lir. Wickremesinghe-i India den tesendaktep tajung ayutsü atema rangloker inyaka arudar aser pa indang foreign policy nung iba ya tongtibang onük ka kümdaksüogo.

External Affairs Minister S Jaishankar-i taküm January ita India semdangtsü atema Wickremesinghe jaokm ajisüaka ita aika atsülangba sülenang tang semdangtsü lir.

Taoba küm Sri Lanka rongsenketzüng kanga mejungi akümba sülen tang jenjang tajungba küma oya aliba mapang ka nung tir-i India semdangtsü lir.

IDBI BANK LTD, Mokokchung Branch,
Yongya and Brothers, Imnameren Road, Mokokchung, Nagaland, Pin-798601

PUBLIC NOTICE FOR SALE THROUGH e-AUCTION

SALE OF PROPERTY OF SHRI LANUWAPANG TZUDIR (BORROWER - M/S TZUDIR ENTERPRISES - SMART SHOPPE) SITUATED AT VILLAGE DIPHUPAR, DISTRICT DIMAPUR, STATE NAGALAND -797112

Provisions of the Securitization and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 dak ajemdaker Lanuwapang Tzudir (Borrower-M/S Tzudir Enterprises - Smart Shoppe) indang ali kimong AO, IDBI Bank Ltd-i February 04, 2023 nü agia aliba ONLINE e-AUCTION ajanga ayoktsü atema IDBI Bank Ltd. (IDBI) Authorized Officer (AO) ka ama Bids/Offerers jaoker.

1. Ali/kimong terasa:
Dimapur district kübok Diphupar yimtsüng nung aliba Patta No. 218, 'K' Khel House no. 78 (as per Land Patta Book issued by Diphupar Village Council) aser Patta No. 139 (and as per Jamabandi issued vide Deputy Commissioner order no. VLs-1/2015-D), P/110891-95 dated 06th October 2015, Dag No. 25/194, Mouza No.03 agi ayimjema aliba ali 963 Sq.mtrs. Arrtsü yamai alitsü; East: Lhovichhe, West: Leishiwon Kumrah, South: Bendang, North: T. Athong Tikher. Ali den külemi kiojen, süngtonglitong aser ali nung teti atema amenoka aliba machinery tem ajak densema lir.

2. The dues of IDBI Bank Ltd. outstanding as on 30.06.2023 stand at Rs. 21,83,674.29/- plus interest cost & charges thereon w.e.f. 01.07.2023.

3. Sale of Bid Document on : 25.07.2023 to 27.07.2023 Between 11:00 a.m. to 4:00 p.m.

Reserve Price	EMD	Date and Time of Inspection	Last date of Submission of Sealed Bids along with EMD & KYC documents	Date & Time of e-auction
Rs.24,30,000/-	Rs.2,43,000/-	25.07.2023 to 26.07.2023 From 11 a.m. to 4 p.m.	27.07.2023 Till 12:00 noon	28.07.2023 From 11:30 a.m. to 1:30 p.m.

4. GENERAL TERMS & CONDITIONS APPEARING IN BID DOCUMENT

- Alli/kimong ya e-auction service provider M/s. e-Procurement Technologies Ltd (ETL or Auction Tiger) ajanga -Auction platform, website : www.eptl.in | www.auctiontiger.net nung ayoktsü
- Ali allitsü jangrartemi parnok indang bid den EMD & KYC documents (PAN card / Address proof) agütsütsü. EMD agizukba sülen bidders temi e-auction service provider M/s e-Procurement Technologies Limited - Auction Tiger ket nungi parnok indang valid email id (mandatory for e-auction) ajanga user id / password agizütsü.
- Alli/kimong aser kiojen ya kodang aser koma yokner yamaji ayoktsü. AO-i sentsüh aliba khuret kecha mabentsü kong yokyatsüya nung talirtem itimem adoktsüsa tetsükdaksü sendaka aliba densema lir aser iba amala kar danga lira ali alirtemi khuret abentsü. Iba dak sendakba nung osang agütsütsü atema bank khuret kecha mali.
- Temalen shisema aliba alli/kimong aser kiojen ya reserve price dak tajemba agi mayoktsü.
- Iba notice sangdongba sülen anogo 15 lir alli/kimong aser kiojen ayoktsü.
- Earnest Money Deposit - (EMD) atema tetemlok mallitsü. Bid atema lapoktsüba anogo nungi tenzüka ita asem atema top three bidders indang EMD AO-i retain asütsü akok.
- AO-i top three bidders tem yongtsü nung inter-se bidding melatsü akok.
- Shiba takok ngua bid sudir pai alli/kimong kiojen ayokba jangjaba sülen sen (less the amount of EMD deposited) shilem 25 deposit asütsü. Yokyatsüyaba sen tanungba ya yokyatsüyaba sülen anogo 15 tsüngda agütsütsüla mesura AO-i mulunga agizukba anogo tashi nung agütsütsüla. Atakzüka aliba mapang tashi nung tanungba sen magütsüetra earnest money densema deposit sua aliba sen magütsü.
- Bid tem kecha kuli magütsü agizütsü mesura magizütsü atema AO dak tashi lir. Bi ajak magizüka SARFAESI Act kübok agüja aliba mode mashi ka amshia alli/kimong aser kiojen ayoktsü AO temeden lir.
- Bid Document nung shilem aaliba alli/kimong aser kiojen ya Secured Creditors tem nem sen apuri agütsüba charges/mortgages ka ajemdaker lir aser iba indang osang tejangja bid document nung shisema lir. Tejangrartem dang alli/kimong aser kiojen indang osang tejangja kanga junga asadangtsü aser AO dang asüngdanga sülen mortgaged assets dak sendakba nung osang tejangja asadangtsü mepeshir.
- Secured Assets dak sendakba nung Secured creditors temi errors/omissions/discrepancy/ shortfall indang khuret kecha mabentsü mesura temelaba kecha magütsü mesura temzüng ozung kübok amenoka aliba ketdangsürtem dues kecha mabentsü.
- Secured Assets ya taa kecha magi ayoker aser Secured Creditors khuret lir.
- Takok ngua bid asürtemi kiojen belemntepsü ateam stamp duty, registration, expenses, tax liabilities amaka kar danga adoker idakji intokba sen ajak agütsütsü.
- Bid Document ya Authorized Officer, IDBI Bank Ltd., IDBI Bank Ltd, Guwahati-II, Regional Office Building (4th Floor), G. S. Road, Guwahati - 781005, (T) 0361-7141101, email : manojkumar.senapati@idbi.co.in mesura Branch Head, IDBI Bank Ltd., Mokokchung Branch, Yongya and Brothers, Imnameren Road, Mokokchung-798601, Nagaland, email : paominlun.haokip@idbi.co.in nungi aser www.idbibank.in nunga download sütsütsü.
- Tejangrartemi (T) (M) / email : utpal.kakati@idbi.co.in / (M) +91 9207057034 / pradip.mandal@idbi.co.in / (M) +91 6900480609 / nunganglemla.lentur@idbi.co.in / (M) +91 6909365409 ajanga ketdangsür den tongteprateptsü.

STATUTORY 30 DAYS NOTICE UNDER RULE 8(6) OF THE SECURITY INTEREST (ENFORCEMENT) RULES, 2002
Date : 11.07.2023, Place : Mukokchung Sd/- Authorized Officer

Goa nungi Rajya Sabha Election atema BJP-i Sadanand shim

New Delhi, Chiteni/July 11 (Agencies): Bharatiya Janata Party (BJP)-i, Goa nungi Rajya Sabha menden ka aliba atema election nung tokteptsü asoshi Goa unit tir Sadanand Shet Tanavade shimogo, ta party lenir kati Mongolbarnü metetdaksü.

Parliament Upper House nung Goa nungi Tendulkar lir aser pa indang term iba ita tatemi tembangtsü.

Rajya Sabha election ya July 24 nü agitsü. Züngsem 40 agi

kümtetba Goa assembly nung BJP aser parnok den longjemer aliba party temi Opposition party tem rongnungi Congress MLA asem, Aam Aadmi Party (AAP) MAL ana aser Goa Forward Party aser Revolutionary Goans Party nungi MLA kaka lir.

Kasa mapang nung Goa nung AAP party tir Amit Palekar-i ashiba agi, Raja Sabha election atema par party-i candidate meyoktsü, züngsem 40 agi

peria mali. Paisa, parnok iba election inyakyim nung shilem agitsü ta shiogo.

"Onoki Assembly indang senti mapang melaludaksüner. Onok Goa Assembly nung kodang züngsem peria kümdir idangji Raja Sabha election nung tokteptsü," ta Palekar-i osangbenertem dang ashi.

Congress candidate pusemstüba indang asüngdanga mapang Palekar-i ashiba agi, Congress-i tang tashi election atema candidate sangdonga mali.



Bankura district nung West Bengal panchayat polls atema vote azüngba mapang TMC pur tejakdang aliba osang angazükba sülen TMC worker aser pusemertem pelatepba noksa nung angur.



TIR YIMYIM

YIMOBILEM (EDITORIAL)

DIMAPUR RASEMNÜ, CHITENI (JULY) 12, 2023

Ao Riju nung AI

Ao Senden kübok Ao Senden Literature Board kümer küm tertenet buba nung Ao Riju (Ao Academy) kümtetbaji Ao kin kaket keno renlokba nung meilongi saka maneni tejakleni aoba takok ka asütsü. Tsüngremi agütsüba Ao oshi agi atenba ken-ang tajungba aser o jembiba-ang tanganütsü taketba ta Aor asoshi dang masü saka Naga nunger kin ter sanger asoshia temoatsü kuma jembia aruba oshiji Ao oshi ya lir. Aji oda, len sapoka aotsü atema nok tajung aika rongnung tajungtiba shimtet ama, Tsüngremia Naga nungertem dang nüchi lenmang sayutsü atema Rev.Dr.Clark den pa kinungtsü Mary Mead dena Ao kin dangi yoka 1878 kumbo Mulungyimsen nung tetsürtem asoshi kaketriju lapoka Ao oshi zülutsü aser azüngtsü sayu tenzükba nungi tanü küm 145 buba nung asenoka asenoksasa tetsüng tenteta Ao Riju lapoker asütsü. Atangji, iba riju tenüng yabo Mary Mead naroküm sünütsüka lai asenok Ao kin asoshi temeim mapa tulu inyaktsüogo. Ashiko, küm 145 jakdang par mapangbo kaketriju nung tamasa zulu angazük tenzük dangbo pencil melen mijang aser süngtang dang amshia tenzük asütsüa akok. Iba nung jagi longpak tanak nung pencil temesüng agi zülua-zülua kaket nung pen agi zülutsü koka aküm aser tanübo computer nung ajener. Iba tsüngdaji Aor putu pungo tashi nung kaketriju balala nung Dr.Clark aser Mary Mead nati anir tamalen züngteter Aor lenirtemi Ao ocep aser tazüngtsü kaket tapu balala zülua züngdaktsüba nungi tanübo Ao oshi ya Univeristy tashi nung agiyonga odagi. Item takoktemji Ao Baptist Arogo Mungdang-i Laishiba meyipzuka adokba den arogo shia nung tila tanurtem sentep nung Ao oshi agi Lai o aser ken sayua aruba den ano Ao Sendeni Literature Board kümteta Ao oshi tebetetba, tajungba aser terenlokba nung aotsü atema kanga temulung agüja inyakba ajanga anguba takoktem asütsü. Aji oda, Dr.Clark o Mary Mead nati sayuba putu sülen ABAM-i anepaluba putu aser ano iba sülen Ao Sendeni Literature Board shimer anepaluba putu ta Ao kaketkeno renlokba nung putu asem süir tang Ao Riju kümtetba ya putu pezübuba asütsü. Joko, tanü putu yabo computer aser digital putu ta dang masü saka Artificial Intelligent (AI) putu kümogo. Ibai asenok asoshi temoatsü putu ka lir, kechiyong yashi tashi asenoki computer ajanga meinyaktetba aser merajemba mapatem ajak AI ajangabo inyaktetsü. AI ya nisungi nisung mesükba nung yangluba tango aser tanüla maliba mapa inyaker ka lir. Ajisüaka, AI ji nisung dang nungibo techiraba aser tashi tuluba. Aji oda, AI-i nisung dang nungdak asüngdangtsü masü saka nisungiang AI dang asüngdangtsü aser temetetnuba ajak AI-iang langzüksü. Kasaji, tanü nisungtemi inyakba mapa aika AI-temi dang inyaktsü. Iba tasenba putu nung AI inyakyim ya kodang bilemdangdir, Ao Riju ki takdang tuluba nung AI Cell ta zülua angur. Joko, AI-i dang Ao oshi zülumen medemtsütsü aser AI nem asenoki Ao ojang tetezü English nung aser English ojang tetezü Ao nung meyipdaktsütsü. Aji dang masü AI nem Ao ken aser sangro mejemdaktsütsü aser AI dang asenok lipok otsütem asüngdangtsü. Aji oda, kaketriju nung zünga aotsüba lesson-tema AI nem dang renemdaktsütsüsa mapang arutsü. Itemji tesüngmangtsüka saka asangsang nung asenoki asüng Ao Riju nung ataloka angutsü. Itemji mapa kuma inyaktsü asoshi Ao lanurtem rongnung Computer Science azünger AI nung Software engineer-tem nungdaktsü. Iba mapaji tenzüksü atema AI dang asenok English nungi Ao oshi nung meyipzükba Laishiba indang sayua tenzüksü akok. Joko, maparen ajak nung AI madenbo tangar memeneptsüba putu mapang ka tenzükogo. Ibai meteta asenok Ao Riju ketdangsertem rongnung Ao oshi ashir dang masü saka Aor lanurtem rongnung AI inyakyim metetba software engineer-tema karbo shimoka amshitsüba kanga tenüngdaktsü asütsü. Atangji, item ajakji angati nübo agibo meinyaktetsüa akok saka ano taa tulu agüjaa meyetetsü, anungji tetsüngda nung tamakok mengui Ao Riju mapatem putu yimya den sütepa inyaka otettsüsa lenirtemi kongsa Ao Riju ya registration agitsü nungdaka ali, itemji awajema inyaka aotsü imlar.

OLEMSABANG

TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

~ Temsüyanger, CTC (source:- Mitkar)

(Yashi adok nungi...)

Kodang Ijip sepai nungbai Ibri nungba tepsetba Mosai angu, pai par nüburtem dak tashiyim aser azütokshiba maremsüktet. Pai khenyongi iba anema sashi sashia nokdak aser kasa temerenshi Mosai Egypt sepai nungba nem meyipa agütsü. Pai chichia kanga sashia nokdak (Ani. 2:11). Kodang Ijip sepai nungbai Ibri nungba tepsetba Mosai angu, pa asoshi lenmang ana dang liasü; kecha mesüi dang toktsür oadoktsü; anabuba nung, pa nüki anguba anema nokdaktsü. Pai nongnanga liasü (Ani. 2:12), saka kodang pa kisüngi iba azütokshiba angu ta pai metet, pai sepaiba dak mangayang aser pa temang lisem nung rema yutsü. Mosai tasü mang miima ayutsü merangba jagi pai ochi asoshi inyaktsü temulungtetba ka ta angateter. Mosa takümi tashiyim aser azütokshiba anema ajem ajema melitet. Ibai Mosa taküm jakla lir nung aketba ka liasü.

Saka nüburtem shirnok pai kümzüktsü merang parnoki pa kuli magizük, anungji pa nisung tepseter ta anemtsü tenzük, aser parnoki pa kümzüktsü memulung. Farao chubai Mosa jendok, anungji pa shiba aser kechi pa taküm jenjang khenyongi samadok. Mosa kisüng kümadok nung media limai jena aotsüsa aküm. Kodang pa media lima atong, sannüker tetsür tenet kari sensamatsüba nungi pai kümzük. Tetsürtem asoshi pai temeden jembitsü, pai parnok yari, aser parnok asoshi pai nokdak. Anungji parnok santem asoshi tzübu nungi tzü angu. Item tetsürtemi tebu Ruel dangi arua iba tatalokba indang ashi (Ani. 2:17-19). Iba tatalokba nung ano maneni Mosa taküm nung aketba yimya ka angur; tangar asoshi aser tangar yaritsü asoshi tangatetba tajung Mosa dak liasü. Talisa shirnok timtem toudhi nung liasü, shirnok sobaliba ajanga amokbanger tashi maitba jenjang tia nung liasü, item nüburtem telok yaritsü aser pa teka ajanga yaritsü tangatetba tajung pa taküm yimya nung angur.

Tanabuba Mosa taküm tekaket nung pa kibong aküm. Kibong kümer külen tebu tajung ka aküm. Küm süiyonga aodang pa taküm sannüker ka aküm. Yamaji Tsüngremer sentong tarutsü asoshi kechi pai memeteti liasü.

Tasembuba Mosa taküm tekaket nung, santem nüka alidang Tsüngremi pa aja (Ani. 3:7-12). Iba tajaba nung Mosa lenisüba mapa aser Tsüngremer tenyaba mapa tenzük.

Ano Kibubai ashi, "Ni atangji kü nüburtem Ijip lima nung ala- ashiba nguogo; parnok tanükertemi timtem agütsüba nungi kümzüktsü ajepba ola ni angashiogo. Parnok otia ajak ni meteta kar. Ijip nunger ket nungi parnok kümzüktsü, aser iba lima nungjagi aniteta alinük tajung aser tesadem ka mamatzü aser ninang mojitzü yima aliba lima; kong Kanan nunger, Het nunger, Amor nunger, Periz nunger, Hiv nunger, aser Yibus nunger lir, ajagi parnok anir aotsü ni alu. Tang Israel purtemi nunga ajepba ola ni angashiogo, aser Ijip nungeri parnok rishikangshiba ni nguogo. Anungji tang arung, kü nübur Ijip lima nungi anitettsü asoshi ni na Farao dangi yokdi. Saka Mosai Tsüngrem dang ashi, "Farao dangi orr Ijip nungi Israel chirtem anitettsüsa ni shiba?"(Ani. 3:7-12).

Tsüngremi pa nem mapa ka agütsü aser aji pa nüburtem Ijip lima nung alar tia nungi anitettsü asoshi khuret agütsü (Ani. 3:16- 17). Tsüngrem den ajurutebpa ajanga pa mabensabatem Tsüngremi jungkai adokdaktsü, aser pa mabensaba taküm ka ta pai meteta aru. Tsüngremi kodang pa nem ozüng agütsü, Mosai Tsüngrem dang tasüngdangba karaa asüngdang. Mosa asoshi kechisa timtem pai ashitsü asoshi Tsüngremi pa nem lenmang lapoktsü. Mosa shiba? (Ani. 3:11); Pa taküm nung aser lokti nung jembishinü majungba (Ani. 4:10); Nüburtemi pa dak mamangtsüba (Ani. 4:1); Pa masü tangar ka yoktsü asoshi asüngdangba (Ani. 4:13), item tasüngdangbatem angutsü. Ibai Laishiba nung Tsüngrem den sensaksem talangtiba angutsü. Ibai Tsüngrem aser Mosa tsüngda kanga dang otiotia jembitepba sensaksem ka lir. Tsüngremi Pa shiba Mosa dang ashi (Ani.3:14). Mosai pa temulung raksabarapoka sayutsü asoshi Tsüngremi temelaba pa nem agütsü (Ani. 4:14).

Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lai tekong lemsatepba mechi Pakistan nung Khristan ka anema ken o benok

Lahore, Chiteni/July 11 (Agencies): Pakistan nung Khristan kati June 30 nü Facebook nung Lai tekong lemsatepba mechi Muslim nungertem ain adoka Sargodha yimti anasa yimtsüng ka nungi Khristan kibong aika pei ki yutsür jena ao aser police temi iba nisungba anema ken o benok.

Muslim nungertem anogo pezü Eid al-Adha benjongmung tenzükba mapang arishi küm 45 tain Haroon Shahzad-i June 29 nü pa indang Facebook page nung 1 Korint 10: 18-21 lemsatepba sülen Punjab Province kübok Chak 49 Shumaali yimtsüng nung tensa mejungi akum.

Muslim nungertem yimdaklir kati iba post tangoka yangji social media group tem den lemsatep aser Shahzad-i Abrahamic yimsü nung takum shiruru tenlaba mezüngmeshi ta aitsü. Eid al-Adha ya Tsüngremi Abraham nem par jabaso melen tenlatsü san ka agütsüba bilemteta amunger. 1 Korint nungya Tenyar Paul-i limapur temi temenen tanüla nem tenla agütsüba indang shia lir.

Shahzad-i iba post nung kecha mashi mesüra dangar jashitsüsa mesüra mashi angatetsüsa kecha shia mali, ta Sargodha nung alir tamanger aser taoba mapang ozüng yanglur Tahir Naveed Chaudhry-i ashi.

"Iba post ya Brehostibarnü nungi tenzüka Muslim nungertem tsüngta lemsatep saka Hokulbarnü sarasadem

sülen mosque loudspeakers nungi nüburtem dang longkak aittsü asoshi adenshitsu ashiba sülen tensa mejungi akum," ta Chaudhry-i ashi.

Chaudhry-i ashiba agi, pa aser yangji aliba Khristan lenirtemi Brehostibar nikonngdang tensa asadang aser iba sülen district administration aser police ketdangsür den tongtepratepa liasü. Mosque nungi sangdongba sülen danga yimtsüngtem nungia lokti adenshia aliba osang angashiba sülen parnoki Sargodha District police nemo sang sangoktsü aser parnoki yimtsüng nung aliba Khristan kibong 250-300 kumzüksü asoshi sepaitem yok, ta pai ashi.

"Police tem mapang shidak nung yimtsüng atong aser Khristanpur dak timtem agütsüba mesüra ki o jen raksatsüba nungibo kumzük. Saka police aliba ajanga lokti tetsükdaktsü makai yimyim ayima liasü. Tensa maziüktetsü südi ta tetsübo nung Khristan kibong timba jena ao," ta pai ashi.

Attorney aser par political party nung tekolakba Chaudhry-i ashiba agi, Shahzad den pa kinungsü aser tanur trok Brehostibar nikonngdang jena ao.

"Tehreek-e-Labbaik Pakistan (TLP) teloki yarisema iba lokti yagi ajungshia Section 295-A aser 298 kübok police temi Hokulbarnü Haroon anema ken o ka benok. First Information Report ya tim masü, kechiaser Haroon-i Laishiba tekong ka lemsatepba dak alaka

tamangba yimsü anema kecha mashi," ta Chaudhry-i ashi.

Section 295-A ya metetsümonga aser asaa tamangba yimsü mezüngmeshia rongdong adokdaksüba indang lir, aser iba ozüng nung aibelenertem tepuokdak küm ter ayutsü mesüra senchi achitsü mesüra anaprong inyaktsü. Section 298 yagi tamangba yimsü tsütsü temolung raksatsüba atema küm ka tepuokdak ayutsü mesüra senchi achitsü mesüra anaprong inyaktsü shia lir.

Chaudhry-i ashiba agi, Shahzad temai adoka police nem bendanga agütsütsü mechi Hokulbar aonung police temi Shahzad tenu kinungbu apu. Shahzad adianu tebur trok tetsüba nung jena ogo.

Par tsürabor ana anepalutsü asoshi tetsür ana yutsür adianutem ajak ajen. Haroon adianu ka aser ano lanur ana pua ayutsü asoshi aruba sülen Deobar aonung tetsürtem ya tepuokdak nungi chiok, ta Chaudhry-i ashi.

"Yimtsüng nung tamangba yimsü tsütsü rongrong adokdaksütsü mechi nisung kari iba post amshir ta onoki angazükli Haroon-i iba post ya indok. Tembar kari pa dang tensa majungtsü amai ajiteta yimtsüng yutsür aotsü ashi, anungji pai par kibong anir ajen," ta Shahzad tenu tanubusang Irfan Shahzad-i Morning Star News dang memettdaktsüba tesem ka nungi ashi.

(Maneni tapak 8 nung...)

ANOGO ABEN TSÜNGREM DEN

Merüka Ayuba

T. ken 119: 9 - 16

Iba memerükba lima nung nai ne taküm koda merüka ayutsü? Ken züluri tekong 9 nung iba tasüngdangba asüngdang: "Asangur nisungi pei lenmang koda merüka yutetsü? Ne o ama aji mita aliba agi." Atangji iba O ya asangurtem atema dang masü. Kasaji aiür, tanur aser tain ajak asoshi lir. Asenok memerükba lima nung alir. Merüka linera Tsüngrem den jajatsüla. Asenok tanela merüka alitsü asoshi ken züluri tütuyuba kar agütsür.

Mezüngbuba, O ji mita liang. Asenoki O ji metetsü asoshi mezüngbuba ibai azüngtsüla aser bushitsüla. Aser asenoki aji metetra, asenoki iba nung tashi angatsüla.

Tanabuba, O ji rizünga yuang." Ni na anema temenen memenatsü, Ne O kü mulung nung rizünga lir" (t. 11). G. Campbell Morgani iba tekong yamaji meyiper, "Iba yagi tajungtiba kaket indang ashir- ' Ne O'- tajungtiba meta - ' kü mulung'- tajungtiba nükjitung - ' ' Ni temenen memenatsü'-Tsüngrem anema. Nai Tsüngrem O nung tashi angar asü? Nai Tsüngrem O ji ne mulung nung ayur asü?

Tasembuba, tangar den lemsatepa ajanga Tsüngrem O ji kü bang agi sangdongtsü (t. 13). Ne mulungjang nung Laishiba lira ibaji ne tebangmechi ajanga adoktsüla kechiaser temulungjang nung sünga aliba tebang agi jembir (t. 13).

Tatema, O ji akhüm tsübuttsüla. " Ni ne ozüng nung shisadanger aser ne lemangtem nung akhüm tsübu lir" (t. 15). Pai kü nem kechi inyakdaksüner ni akhüm tsübuttsü. Kü Bui kü nem kechi inyakdaksüner ni Pa dang tashi angatsü.

Tsüngrem O nung merüktedaktsüba tashi lir. Saka iba yagi ne taküm nung mapa meinyakdang tama nai O ji agizüksüla. Tsüngrem O nung tashi angang aser iba temenen lima nung Pai na merüka yutsütsü

ABAM den Aor Laishir aser Tesayurtem Telungjem sentong agi



Dimapur, Chiteni/July 11 (TYO): Dimapur area nung aliba Theological college tem nung Aor Laishir aser Tesayurtem den ABAM-i ayonga telungjem sentong ka "Tesendaktep Akhangshiba" omen nung ajemdaker Discipleship Bible College (DBC), Dimapur nung July 11, 2023 nü kanga temoatsü ngua agiogo.

Dr. Moanungsang, Secretary, Literature & Education, ABAM ajanga iba sentongya tanü alima khenyongi aseni mapiteta jenjang ka nung aodang asenok kati ka meteta aliba ajanga tensa tia ajak nung tiptema

amalitetsü asü nung ABAM-i ABAM chirtem bushia arua iba sentong ya agir, ta okila dang shisem.

Rev. Dr. Prof. Mar Pongener, Executive Secretary, ABAM ajanga Tsüngi O ashiba mapang, asen Aor lestep tsüngtep mapang, Khristan yimsü arua taochi angur rongnung denssem. Tenyaba mapa inyaktsü mulungteta lemteter talisa kiyonger kin 7 dangi osang tajung bener ao. Aser ano Arunachal nung kin asem den tenyaba mapa inyak. Yamaji lenmang aisünung ABAM-i Tsüngrem mapa inyakba tem lir, ta ashi.

Tanü lanu putu nunga sarasadem aser Lai angateten akhanga alitsüla ta ashi. Aji mesüra tanü tensa Yisu maliba Arogotema aika tenteta aoba nung shilem agiatoker rongnung dena adoktsü. Anungji Yisu chichia akaba taküm aser tenzük ka-ka asütsü merangang ta akhang akhanga ajungshi. Maneni yamala telungjem agatsü ABAM mangdang lir ta shisem.

Paisa laishirtemdang ABAMji kechi meteta alitsü aser tetsü oshi meima jembitsü tamatok ta ayongzük.

Ano na kechi arogo nungi aru aji tamatok aser sannüker aser arogoi ne kuli sütetsüsa nai liang, ta ashi.

Tongtipangsa pai ashiba kaji, Laishir ka asübayabo Tsüngrem den tenangzüktepba tulu akaba nübo asünung, shisatsü bushiba den tamang

theological college tem nung renemteter yokba laishirtem ABAM ajanga ano tajungba nung moluteta amshitsü shisem aser yamala telungjem metangdangi tarutsü mapang nunga agitsü teyongyaba lir ta lemsatep.

Ajak agi tang tezüngdak pur aser tesayurtem 250 dak tema arua iba sentong nung aden. Iba sentong Toshi Sanglir, Secretary, ABAM YM-i ani aser tatem nung Rev. L. Yapang Mollier, Secretary, Church & Mission, ABAM ajanga Aor Laishirtem aser Tesayurtem asoshi bendanga agüja sarasadema sentong tempang.

**AO OSHI ANGAZÜKDAK:
TANÜ ANGAZÜKTSÜBA OJANG**



Rentep

(v) o ashishitep, o langtep (argue)

* Lenir ana tsüngda o **rentepba** agi telok akoksa.

Rentet

(v) küm abensaba (completion of a period)

* Ojala küm ka **renteta** ozü kidang among.

OLONG PAITEP # 6573

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S___i - (3)
- 9. Nisung telemasa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6572 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Zübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong,
- 13. Ajizük, 14. Aitsü, 15. Tasa,
- 16. Aina.



**YIMDAKLIR KA TOWN-i ARUAGI ANEPDANG 10:30
TASHI NUNGA OFFICE NUNG SHINGA MALI,
KETDANGSER KA DANGI PHONE ASÜR :**

Yimdaklir : Hello, ya amola südi? Amo, naibo ni memetet asüja, saka nibo na junga meteta lir, ni tanep yimer bus nung nenok den tongtipang mapa ka atema aru sürnung office nung shinga maliba agi sodi asü masüar ta ati.

Ketdangser : Sodi mahako, tang ya 10:30 angato, onok ajak 11:30 tashi nungang office tongseper nung koda? ataa liang.

Yimdaklir : Amo ya ni tanüsa meyipa luner akoti, aser office timming bo 9:00 AM nungi masüna?

Ketdangser : Nenok yimdakliri kechi metetet, huh! Onok molung, na atadi süra atang, mesüra yim busji aria luang.

Yimdaklir : Onok yimdaklirji kecha memeteta, saka onokia Hornbill TV pur karbo meteta lirkodi, ni tang Parnokji phone nung jadi?

Ketdangser : Ayayaya, oko khen ataa liangma, ni tarurrrr.

- Lilir : WhatsApp

**Meghalaya nung Manipur
nungi arur 77 jenoka lir**

Shillong, July 11, 2023

(Agencies): Manipur nung kin o kin tsüingda rara adokba sülen nisung 45,000 tashi pei talidak toktür jena ogo aser parnok kar Meghalaya nunga jenoka lir.

East Khasi Hills Deputy Commissioner RM Kurbah-ibo Mongulbarnü Manipur nungi nisung 77 tashi Shillong nung jenoka lir ta ashi.

Mezüngbo Manipur nungi nisung 365 aru saka parnok teimba ka Aizawl, Guwahati, Bangalore, New Delhi aser tanga state temi ogo ta EKHDC Kurbah-i ashi.

Nisung 365 arubaji Gangte, Meitei aser Kuki nungler liasü ta paisa shisem.

Tanü osangbener senden nung DC Kurbah den East Khasi Hills SP Sylvester Nongtnger aser Additional District Magistrate Ronnie Wahlang na aden.

Kin asem nungi lennirtem den senden ka amendang Shillong nung tang nisung 77 dang arua jenoka aliba osang lemsatep ta Additional District Magistrate Ronnie Wahlang-i ashi.

Parnok ya kinungertem mesüra para kidang alir. Parnok karbo Manipur-i meyipa ogo aser kar Mizoram-i ao, ta Wahlang-isa shisem.

SP Nongtynger-ia kin balala lennirtem den senden ka menogo aser yimjung nung alitsü lemsatepba den Meghalaya state police den amalitepa yaritepsü ashi.



OFFICE OF THE
YAONGYIMSEN SENSO TELONGJEM DIMAPUR
Dimapur - 797112 : Nagaland.

KONANG TETUSHI AGÜTSÜR



Dr. Alemtola

YSTD züngsem tajung,

Wb. R.C. Tocy Ao aser Wt. Temjenmongla tena jala

Dr. Alemtola, lai NPSC CESE 2022 tatidang nung

Assistant Professor in Philosophy

under Higher Education Department nung takok

tajung ngutetba atema tenüngsang agütsür.

Ano senso sanger tesem balala nungi shirnokisa tatidang balala nung takok tajung ngua asen yimer nem konang nüngsang bener arutsüogo nenok ajak dang asen YSTD kübok lokti tentet ajak tenüng nung pelaba lemsateper.

Tsüngremi tarutsü nunga nenok ajak taküm temoatsü nung len aniangma ta onok sarasadem.

Sd/-

Wb. I. Sanen Lkr.


Tir.

Sd/-

Wb. Temjen A Imsong

Tezülar

Onet Tenemtsüng nung alir Temsen Walling kaket saya



Noksa nung (L-R) Temsen Walling jala tantsüla Temjenmenla, jabaso tanubosang Alidangba, Rev. Temshi Pastor CTBA, kaket zülur A. Imtisoa aser kaket adoktsür Woods Publishers kibur Repalemzung angur.

Changtongya, July 11, 2023:

Tanü The Hideout restaurant Changtongya Town nung Changtongya Town Baptist Arogo pastor Rev. Temshi-i A. Imtisoa-i züluba kaket tenüng agi 'Onet Tenemtsüng nung alir Temsen Walling' ajanga sayatsüogo.

Kaket mulung indang jembidang kaket züluri ashiba agi iba kaket ya Khar nunger Temsen Walling shiba Federal Government of Nagaland nung Naga Army ka liasü, pa China limai apusoa aodang lentom nung Burma Army den chiteper timtem ajuruba otsü ka lir ta shia

liasü.

Iba sentong nung kaket adoktsür Woods Publishers, Kohima kibur Repalemzung, Temsen Walling kinunger nungi tesayur P. Tako Jamir aser All Ward Union Changtongya Town Chairman Samuel, parnokia o jembia liasü.

Nagaon nung Assistant Conservator of Forest ka apu



Guwahati, July 11, 2023

(Agencies): Directorate of Vigilance and Anti-Corruption-i Mongulbarnü Nagaon nung

Assam Forest Department kettangsur ka apu.

Iba nisung ya Assistant Conservator of Forest (ACF)

Nepal Chandra Mandal ta jangjaogo aser pa ya Nagaon Forest Division kübok Forest Range Officer inyaka liasü.

Mandal-i challan/transit permit agütsütsü atema nisung ka dang nungi süpokrem meshi ta tai tonglokja lir.

Ketdangsurtemi pai süpokrem sen kwi meshi'ar mashi saka pai Rs 500 aika bona lia apu.

"Range Officer, Northern Range, Salona, Nagaon Division Nepal Ch Mandal-i TP (challan) agütsütsü atema süpokrem meshia agidang DIR_VAC_ASSAM-i pa apu" ta V&AC-i metetdaksü.

Tesüiba ita ishika kettangsurtemi ochimashi inyakba atema puogo aser parnok aika tepuokdak yua lir.



July 11, 2023 : Raksar aliba Fukushima nuclear power plant nung 'treated radioactive' tzu tzüym nung inoktsütsü asoshi Japan sorkar sentong aliba anema South Korean aser Japan nunger civic group züngsemtemi Seoul, South Korea nung rally ayongzuka agidang tangokba noksa nung angur. Tzüym nung iba tzu inoktsüba ajanga ango dak metaloka aliba nüburtem aser lipajen nung kanga mejungi kongshitsü ta shisabolua lir.

Pakistan nung tzünglu kanga sashia aruba ajanga nisung 86 süogo

Islamabad, Chiteni/July 11 (Agencies): June 15 nü nungi tenzüka Pakistan nung tzünglu kanga sashia aruba ajanga tang tashi nung nisung 86 süogo aser nisung 151 yiruogo, ta National Disaster Management Authority (NDMA)-i ashiba ARY News sangdong ka ajanga metetdaksü.

NDMA indang report nung ashiba agi, taoba ghonda 24 tsüngda Pakistan kübok tesem balala nung tzünglu kanga sashia aruba ajanga nisung trok süogo aser nisung teku yiruogo, ta ARY News-i metetdaksü.

NDMA data ajanga, tetsür 16 aser tanur 37 densema tang tashi nung nisung 86 asüba aser nisung 151 yiruba sayuogo.

Linük ajunga nung tzünglu kanga sashia aruba ajanga timtem tulu adokdaksür aliba mapang ki 97 raksatsüogo.

Province ajak rongnung Punjab province tamajungtiba kongshir lir, kong tang tashi nung

nisung 52 süogo. Kasa mapang nung Khyber Pakhtunkhwa nung nisung 20 aser Balochistan nung nisung trok süogo, ta NDMA report ajanga metetdaksü.

Taküm küm April ita NDMA-i, 2023 küm Pakistan nung tzümetüng tesashi arutsü shilem 72 lir, ta takzüsüogo. Public Accounts Committee (PAC) nem osang agütsüba mapang NDMA mendenbuba Lieutenant General Inam Haider-i ashiba agi, temperature tali akümba, glacier yimsa aoba aser tzünglu kanga aruba ajanga tzümetüng adokdaksütsü akok, ta ARY News-i ash.

Haider-i ashiba agi, NDMA aser Pakistan indang Climate Change Ministry-i satellite 17 asadangdar aser tesem 36 nung tzümetüng arutsü ana nung aliba tekümdangtsü metetdaksüogo. Paisa, taoba küm ama tang tzümetüng arura

Pakistan rongsenketzüng nung kanga takoksa ajurutsü, ta ashi.

Kasa mapang nung tang tzünglu kanga aruba mapang Punjab province nung Lahore kübok Azhar aser Shahdara jila nung nung kilem ana chirtepa nisung teku yiruogo, ta Dawn osang kaket sangdong ka ajanga Honibarnü metetdaksü. Ajisüaka rescue agency-i ashiba agi, lendong nung nisungtem kanga mejungi yiruba osangbo mali, ta Dawn-isa metetdaksü.

Lendong nung yirurtem ajak temang anepalutsü atema mozükidangi anri ao, ta osang nung shia lir.

Punjab indang relief commissioner Nabeel Javed-i, Provincial Disaster Management Authority (PDMA) control centre semdangogo, kong pa dang ayongtem metzüngba ajanga lendong bener arutsütsü ana nung aliba indang metetdaksüogo.

NATO nung Sweden züngsem akumtsü Turkey-i molunger

Stockholm, Chiteni/July 11 (Agencies): Northern Atlantic Treaty Organisation (NATO) nung Sweden züngsem akumtsü asoshi meranga aruba sülen tang ya iba linük asoshi otsüsütsü mapang lir.

Iba Nordic linük ya tesüiba küm 200 dak tema rara mapang telok ka nunga maden aru, saka Russia-i Ukraine amakba sülen northern Europe nung security tajungba kumdaksütsü aser tashi aittsü merangba nung shilem ka ama NATO züngsem akumtsü taoba küm May ita asüngdanga liasü.

Ajisüaka Hombar aonung tashi Turkey-i Sweden indang application nung tenokdangba agüja arua liasü.

Sweden-i Kurdish militant tem nem anisüngzükdak agütsür aser Kurdistan Workers' Party (PKK) ama telok anema nokdaksü asoshi tali inyaksü nüngdaker, ta Turkey-i shia aru. Turkey, European Union aser United States linüktemi PKK ya kiralongrar telok ka ama

züngshir. Danga NATO züngsem linük 31 ama linük tasen iba telok nung adentsü merangba nung tenokdangba agütsütsü Turkey dak tashi lir.

Tir Recep Tayyip Erdogan den ajasa jembiba ya Sweden indang right-wing Ato Kilonser Ulf Kristersson asoshi takok tuluka amai ajiteter.

NATO nung Sweden adentsü asoshi mezüng application ya Kristersson jakdang inyaka alia Social Democrat nungi Magdalena Andersson-i agüja liasü, saka October ita Sweden lenir akumba sülen pa indang foreign policy nung NATO züngsem akumtsü ya tongtipangtiba liasü. Kiralongrar asoshi Turkey-i süoki ia bilemba nung takok ngua inyaksü asoshi ni aser ozü teloki kanga meranga inyaka aru aser onoki inyakba sayutsü melaba sülen tezüngzüktep ka agi, ta Kristersson-i ash.

Sweden nung June ita anti-terrorism laws tesashiba benoka

kiralongrar teloktem nem senotsü mesüra osettsüset agütsüba nokdang.

Taoba hopta tatemlen iba ozüng ya mezüngbuba mapa kuma inyaka Sweden court kati Kurdish nunger ka tepuokdaki yok, shibai senotsü tsütsü kiralongra mapa inyaksü merang aser linük nungi pa meindoktsü ash.

Sweden-i Turkey dang nok-nü ayokba maparen tenzükshia liasü. "Iba alliance-i aitba linük ajaki security tsütsü shilem agitsüla ta parnoki akhangba tejangja onoki süoki ia agizüka liasü," ta ato kilonseri ash.

Ankara-i aginüba ama inyakba sülen European Union nung Turkey adentsü merangba nung yaritsü, ta Sweden-ia nangzüka liasü.

NATO nung Sweden züngsem akumtsü merangba anema Turkey nokdakba tatem kati arur asünung, Turkey-i F-16 fighter jets alitsü asoshi asendenshir jembishinü tenzüksü US-i molungogo.

Office of the Longkhum Sensotsür Telongjem TENÜNGSANG AGÜTSÜR

NPSC Common Educational Service Commission 2022, tatidang nung **Sb. Moasoba Anichar** S/o Wb. Menangkaba aser Wt. Toshiangla, pai Post Graduate Teacher in Physics nung takok nguteta sensosanger mera ketdakja konang tenüngsang bener arutsü nung Longkhum Sensotsüri tenüngsang agütsür.

Tarutsü nung ne wadang Tsüngremi moajangma.

Sd/- Amenla
President

Sd/- Achila
General Secretary

LAND FOR SALE

NAGA UNITED VILLAGE

Near Daily Bazar
Dry Land - Price - Rs. 380/- per Sq.ft.
Contact - 9612448446 / 8798119488

UN 'list of shame' nung Russia lir, Israel bo maden

Geneva, Chiteni/July 11 (Agencies): Ukraine den raraba mapang tila tanur noklang aika tepsetba aser yirutsüba atema Russia indang mitkar aser parnok den sendaktepa aliba sepaitem United Nations indang "list of shame" nung züngoksemogo, saka taoba küm Palestine nunger tila tanur 40 dak tema tepsetaka Israel sepiatembo mezüngsem.

Occupied West Bank nung Palestine nunger tila tanurtem tepsetba aser yirutsüba mechi human rights organisation temi UN blacklist nung Israel inoktsü aiben ajungshia liasü.

UN Secretary General Antonio Guterres-i shame list nung Israel mezüngoktsü telemtetba agiba ya aibelen tulu lir, ta Palestinian Ambassador to the UN Riyad Mansour-i Brehostibarnü ash.

Rara aliba tesem nung tila tanurtem amshiyim indang UN annual report koba UN Security Council züngsemtem nem Brehostibarnü lema agütsü, yangji Guterres-i ashiba agi 2022 küm Ukraine nung tila tanurtem anema azüdokshi onsara aliba ngua pa süngmager.

Iba report indang copy ka anguba news organisations temi ashiba agi, taoba küm Ukraine nung tila tanur 477 tepset ta zülua lir, yangji tasüba 136 bo indang indanga Russian sepaitem aser par den sendaktepa aliba teloki lir.

Ukraine sepaitemi tila tanur 80 tepset, ta report ajanga ashir. Tanüngba tila tanur asü-amaba atema linük ana rongnung kata tenüng mesenteter. Tila tanurtem ya timba tayimtsü amshia amakdang asü, ta UN report nung shia lir.

Russian sepaitem aser parnok den sendaktepa aliba telok temi Ukraine nung tila tanur 518 yirutsü aser school aser mozüki 480 amak, ta UN-i jangjatet, Russian sepaitemi 'human shields' ama tila tanur 91 amshi. Ukraine sepaitemi tila tanur 175 yirutsü, school aser mozüki 212 amak. Ajisüaka Ukraine sepatem iba list nung inoka mali.

2022 küm Israel sepaitemi Palestine nunger tila tanur tepsetba atema süoki ia bilemer, ta UN tekolakbai report nung shia lir.

Report ajanga ashiba agi, 2022 küm Israel sepaitemi Palestine nunger tila tanur 42 tepset aser 933 yirutsü. 2021 küm Israel sepaitemi Palestine nunger tila tanur 78 tepset.

Tila tanur tepsetba yong UN maksütsüba linüktem rongnung Israel ya kodanga medemsem.

Tayimtsü amshia amakba densema Israel sepaitemi tila tanurtem tepsetba taoba küm den medemdangra kanga tajemba lir, ta Guterres-i ash.

Russian sepaitem tenüng amshitsü UN-i lemtetba atema Human Rights Watch-i pelashishia agizük saka Israel tenüng mezüngokba atema UN tekolakba aitsü.

"Secretary General ajanga Russian sepaitem pa indang 'list of shame' nung bendenlokba ajanga tila tanur anema azüdokshiba par tai ta kumtsür. Saka pai küm shia Israel sepaitemi tila tanur anema azüdokshiba mezüngokba ajanga pasa aitsür. Iba yongji Israel sepaitemi Palestine nunger tila tanur anema tashiyim amshitsü temolung ulushidaksür," ta iba telok indang advocacy director for children's rights, Jo Becker-i ash.

"2015-2020 nung tila tanur 6,700 asüba Israel sepaitem dak tai tonglokja lir. 2022 nunga ano 975 asüba pai jangjaogo. Saka pa indang 'list of shame' nung Israel mezüngok," ta Becker-i tweet ka nung ash.

UN report yagi Democratic Republic of the Congo, Somalia, Syria, Haiti aser danga linüktem nung tila tanur anema azüdokshiba aija lir.

ALIASER KIAYOKER
Lengrijan, Dimapur
nung Aor Baptist
tenla ki anasa ki
dena ali yokner.
Contact :
88374 03351.

Nagaland Basketball Association-i trials ayongzüka agitsü

Dimapur, Chiteni/July 11 (TYO): Junior Boys team nung asayartem shimtsü atema trials ka agitsü asoshi Nagaland Basketball Association (NBA) renema lir.

Iba trail ya July 15 nü 3:00 ako nungi tenzüka JV Foundation Basket Court, Signal Angami nung agitsü.

Iba trail nung shimba asayartem taruba 48buba Sub-Junior National Basketball Championship nung Nagaland tenüng nungi asayatsü. Iba

asayamung ya Puducherry nung August 3 nungi 9 tashi asayatsü.

Iba trail nung 01.01.2010 nü mesüra iba masü dang asortemi dang shilem agitettsü. Trail mapang asayartemi pei Birth Certificate aser Aadhar Card bener arutsü nungdaker.

BFI guidelines kübok asayamung mapang asayartemi Municipal Corporation/ Registrar of Birth & Death-i agütsüba Original Birth certificates aser Aadhar

card bener arutsü nungdaker. Iba Birth certificate ya asayar ka asoba küm mesüra sor küm asem tsüngda agizükba asütsüla.

Trails dak sendakba nung osang osang tejangjaba agitsü atema item number; +91 98640 34256/98625 47901/94360 16529 den tongteprateptsü asoshi Nagaland Basketball Association Hon. Secretary Sentiningsang Longkumer-i sangdong ka ajanga metetdaksüogo.

Sen aser Sindhu nati anir US Open asayatsü



Chiteni/July 11, 2023 (Agencies): Canada Open champion Lakshya Sen aser PV Sindhu nati anir India nung asayartem Mongolbarnü nungi tenzüka US Open Super 300 badminton tournament nung asayadaki.

Sen temang nung timtem aliba ajanga taküm junga masayateti arur Deobar aonung Canada Open final nung pai All England Champion Li Shi Feng straight-game nung koka liasü.

Iba asayamung akokba ya pa atema ita 17 tsüngda mezüngbuba BWF title ka abenba liasü aser US Open

nunga junga asayatsü imla alitsü, kong pa third seeded asayar lir aser pa mezüngbuba asaya Finland nung asayar Kalle Koljonen den asayatsü.

Kasa mapang nung Tokyo Olympian B Sai Praneeth, shiba tang junga masayateti aruba mapang ka lir pa iba asayamung nung mezügbuba asaya second seed aser world number 10 asayar Feng den asayatsü shiba Calgary nung final tonga asayaogo.

Tetsür kija asaya nung Olympic nung medal ana tashi ngur alila PV Sindhu, maneni iba asayamung nung taküm mezüngbuba title abentsü

meranga asayatsü aser la qualifier ka den mezüng asayatsü.

India tsür la ya taküm Madrid Spain Masters final tonga asayaogo aser Canada nunga semifinal tonga asayaba sülen tang iba asayamung nung asayatsü lir.

Iba asayamung nung tetsürtem rongnungi Thailand tsür world champion Ratchanok Intanon top seed asayar lir aser la Sindhu nung pool nung lir aser iba den asayamung nung ano second seed

Busanan Ongbamrunphan, fourth seed Beiwen Zhang aser eighth seed Line Christophersen nung asayar aka asayaba angutsü.

Ruthvika Shivani Gadde iba asayamung nung Chinese Taipei tsür Lin Hsiang Ti den asaya tenzüksü.

Tebur tarep asaya nung Krishna Prasad Garaga aser Vishnuvardhan Goud Panjala na Taipei nung tarep Lin Yu Chieh aser Su Li Wei na den mezüng asayatsü.

Rutaparna o Swetaparna na aser Apeksha Nayak o Ramya Chickmenhalli Venkatesh nungera tetsür tarep asaya nung shilem agitsü.

Spain nung linük 4 hockey asayatsü atema Indian squad sangdongogo

New Delhi, Chiteni/July 11 (Agencies): Küm tatemlen Hangzhou nung Asian Games atema squad renemtsü nükjidong nung India nung tebur hockey asayar indang chief national coach Craig Fulton-i Spain nung July 25-30 anogotem linük pezü asayamung atema asayartem shimogo.

Terrasa, Spain nung linük pezü 100th Anniversary Spanish Hockey Federation - International Tournament atema Hockey India ajanga Hokulbarnü züngsem 24 aliba tebur team sangdongba nung defender Varun Kumar aser Nilam Sanjeep Xess den Sumit aser Nilakanta Sharma densema lir.

Iba asayamung nung India,

England, Netherlands aser asayamung ayonger Spain asayatsü aser ibai kanga yongya aliba Asian Champions Trophy, Chennai nung asayatsü aser iba sülen Hangzhou Asian Games 2023 atema terenemshiba ka amai lir.

London aser Eindhoven nung FIH Hockey Pro League asayatsü asoshi squad nung madener asayartem repranger, ta Fulton-i ashi. Kasa squad ya linük tenüng nung Asian Championship Trophy asayatsü, koba August ita Chennai nung alitsü.

"Pro League atema asayar 18 dang shimtsü alinung, core group nungi danga asayartem reprangtsü asoshi maongka mangu. Anungji parnokji Spain nung tendangtsü aser Chennai

nung Asian Champions Trophy atema asaya ana densemstü," ta Fulton-i Hokulbarnü ashi.

Linük pezü asayamung asoshi Indian squad yamai alitsü:

Goalkeepers: Sreejesh Parattu Raveendran, Krishan Bahadur Pathak

Defenders: Jarmanpreet Singh, Nilam Sanjeep Xess, Manpreet Singh, Amit Rohidas, Harmanpreet Singh (C), Varun Kumar, Sanjay

Midfielders: Hardik Singh (VC), Vivek Sagar Prasad, Sumit, Nilakanta Sharma, Shamsher Singh, Rajkumar Pal

Forwards: Lalit Kumar Upadhyay, Mandeep Singh, Gurjant Singh, Sukhjeet Singh, Abhishek, Pawan, Dilpreet Singh, Simranjeet Singh, Karthi Selvam.

Pak. nung FIH Olympic qualifiers ayongzüka asayatsü

Chiteni/July 11, 2023 (Agencies): International Hockey Federation (FIH)-i taruba küm tetenzüklen Pakistan nung Olympic qualifying rounds asayatsü asoshi lemzüksüba sülen küm 19 shi lir Pakistan nung tang mezüngbuba international hockey asayamung ka ayongzüka asayatsü.

Pakistan nung tatemsa 2004 küm FIH asayamung ka ayongzüka asayaogo, taruba küm January 13 nungi 24 tashi Lahore nung team ti asayaba asayamung ka ayongzüka asayatsü.

"Pakistan nung hockey fan tem kidang linük balala nungi nungtugu hockey asayartem küm 20 shi merprangi aruogo aser FIH Olympic qualifiers ayongzüka asayaba ajanga Pakistan nung iba asaya tali ajungkettsü," ta FIH Secretary-General Haider Hussain-i ashi.

Paisa, Pakistan Hockey Federation-i iba asayamung Pakistan nung ayongzüka asayatsü atema FIH kanga junga koktetogo.

"Pakistan nung tanaben

international hockey asayamung balala ayongzüka asayara iba ajanga linük nung asaya ajungkettsü ta onoki bilema mepeshiba linük aikati pusemba atema kanga pelar." Tia maka Pakistan 2016 aser 2021 küm Olympic Games atema qualify mesütet, ajisüaka Hussain-i Lahore nung iba asayamung reprangtsü atema fan tem telong junga arutsü imlaba lemsatop.

Format dak ajemdaker qualifying round nung Asia nungi temaba jenjang nung aliba team pongu, Europe nung tenet, Pan America nungi ana aser Africa o Oceania nung kaka ta tokteptetsü.

Olympic qualification asayamung ajak nung temaba jenjang nung tembangba team asemsem Paris 2024 atema qualify asütsü.

Pakistan team tang ranking nung jenjang 16buba nung lir aser parnoki Asian Games mekokaka Paris Olympics atema qualifying round nung tokteptetsü aser parnok India, Korea, Malaysia, Japan aser China den asayatsü.

Lai tekong lemsatepba mechi... (Tapak 5 nungi...)

Hokulbarnü sarasadem sülen sangdongba ama yimtsüng ana-ase nungi nisungtem adenshir ta angazüka onok takum kumzüksü mechi ajen. Temang majungba ajanga ozü tsürabortem yutsür ao, anungji keyi ana indang kinungbu anati parnok anepalua yangji alitsü lemtet. Parnok kinü tanurtem lir ta metetaka police temi parnok apuba ya maksü lir, ta Irfan Shahzad-i ashi.

The Voice Society nungi attorney Aneeqa Maria ajanga Haroon Shahzad ya Hombarnü (July 3) pre-arrest bail angu. Bushisüngdangba nung Shahzad-i tashi angatsü, ta lai ashi saka Mongulbarnü (July 4) police temi pa "protective custody" nung ayu.

Section 298 nung aibelener nem bail agütsüteter.

Lai ashiba agi, Haroon Shahzad ya merit nung bail angutsü temsüa lir, kechiaser 'private citizen' kati ozüng alema Section 295-A ya benok, ajisüaka Section 295-A kübok provincial government aser federal agencies ajanga dang FIR benoktettsü, ta Criminal Procedure Code (CrPC) indang Section 196 nung shia lir.

Tai tonglokja alisang, par kinunger aser danga Khristanpur takum lendongi yoka tamangba yimsü mezüngmeshiogo ta tiazü nung olulu prokshia lokti ajungmesoba

mechi lai Shahzad tenüng nung iba post ashishir Muhammad Imran Ullah anema Anti-Terror Act indang Section 7 kübok legal action agitsü meranger, ta Maria-i ashi.

Haroon-i bushisüngdang den amalitem akatsü lemtetba sülen police temi pa tenu aser lanur ana chiok, ta lai ashi.

Tekülem ki ka yanglutsü mechi sorkari Shahzad nem ali ka agütsüba mechi Ullah ya Shahzad den ken o jembia arua liasü, aser iba mechi pai tai tongloktsü, ta osang ajanga ashir.

Shahzad tebu Younis Shahzad ya yangji aliba Presbyterian church nung züngsem ka liasü aser pa tenüng nung ali kanal ana (kanal kaji acre ka shilem ti kuma lemsaba nung shilem ka lir) agitsü aser yimtsüng ya Sargodha tezülen lir asünung ali ya jenjang tulu lir, ta Chaudhry-i ashi.

Iba ali mechi Imran den nisung kari Khristanpur tekülem ki mey angludaktsütsü mechi aiben okadak ken o benoka liasü. Ajisüaka küm pezü ken o jembia arur taoba küm stay orders ya agien aser iba mechi tejashitep adok, ta pai ashi.

Open Doors ajanga alima nung Khristanpur alitsü asoshi linük tamajungtiba 50 asadanga 2023 World Watch List nung Pakistan ya jenjang tenet buba nung lir.

BILEMDANGANG
"Timla agi nisung taküm ka anir."